



REPUBLIKA E SHQIPËRISË  
KËSHILLI I EMËRIMEVE NË DREJTËSI

VENDIM  
Nr. 123, datë 10.09.2019

PËR VLERËSIMIN DHE PIKËZIMIN E KANDIDATURËS SË Z. BESNIK MUÇI NË  
VENDET VAKANTE PËR GJYQATAR NË GJYKATËN KUSHTETUESE, TË  
SHPALLURA NGA PRESIDENTI I REPUBLIKËS NË DATËN 07.02.2018, DHE  
KUVENDI I REPUBLIKËS SË SHQIPËRISË NË DATËN 12.02.2018

Këshilli i Emërimeve në Drejtësi, i përbërë nga :

<b>Ardian Dvorani</b>	- Kryetar
<b>Vitore Tusha</b>	- Zëvendëskryetare/Relatore
<b>Arta Marku</b>	- Anëtare/Relatore
<b>Margarita Buhali</b>	- Anëtare
<b>Fatjona Memçaj</b>	- Anëtare
<b>Fatri Islamaj</b>	- Anëtar
<b>Eriol Roshi</b>	- Anëtar

Asistuar nga sekretare **Dorina Dulaj**,

Me praninë e **Avokates së Popullit, znj. Erinda Ballanca**, në cilësinë vëzhguesit të përhershëm të mbledhjeve dhe veprimtarisë së Këshillit të Emërimeve në Drejtësi,

Me praninë e përfaqësuesve të autorizuar të subjekteve të ftuara sipas ligjit për pjesëmarrje, në cilësinë e vëzhguesve, në mbledhjen e Këshillit:

- **z. Bledar Dervishaj**, përfaqësuesi i autorizuar i Presidentit të Republikës, në mbledhjen e datës **07.08.2019**, mori në shqyrtim çështjen që i përket:

**KANDIDAT PËR GJYQATAR  
NË GJYKATËN KUSHTETUESE:**

**Z. Besnik Muçi**

**OBJEKTI:**

Vlerësimi dhe pikëzimi i kandidaturës së **Z. Besnik Muçi**, në vendet vakante për gjyqtar në Gjykatën Kushtetuese, të shpallura nga Presidenti i Republikës në datën **07.02.2018** dhe Kuvendi i Republikës së Shqipërisë në datën **12.02.2018**.

**KËSHILLI I EMËRIMEVE NË DREJTËSI**

Pasi shqyrtoi relacionet e përgatitura nga anëtarët relatore të Këshillit, **znj. Vitore Tusha** dhe **znj. Arta Marku**, dëgjoi mendimin e paraqitur nga **Avokati i Popullit, znj. Erinda Ballanca**, në cilësinë e vëzhguesit të përhershëm në mbledhjen dhe veprimtarinë e Këshillit të Emërimeve në Drejtësi, lidhur me mënyrën e procedimit të ndjekur për vlerësimin dhe pikëzimin e kandidatit, dhe si bisedoi çështjen në tërësi,

## VËREN:

### I. Rrethanat e çështjes

1. Këshilli i Emërimeve në Drejtësi me Vendimin nr. 71, në datën 24.07.2019 ka vendosur lejimin e kandidimit të kandidatit Besnik Muçi për gjyqtar në Gjykatën Kushtetuese, në vendin vakant të shpallur nga Kuvendi i Republikës së Shqipërisë në datën 12.02.2018, për plotësimin e vendit vakant të krijuar në Gjykatën Kushtetuese pas mbarimit të mandatit të gjyqtarit Vladimir Kristo.
2. Këshilli i Emërimeve në Drejtësi, me Vendimin nr. 72, datë 24.07.2019, ka vendosur lejimin e kandidimit të kandidatit Besnik Muçi për gjyqtar në Gjykatën Kushtetuese, në vendin vakant të shpallur nga Presidenti i Republikës në datën 07.02.2018, për plotësimin e vendit vakant të krijuar në Gjykatën Kushtetuese pas mbarimit të mandatit të gjyqtarit Sokol Berberi.
3. Në zbatim të dispozitave të ligjit nr. 8577/2000 dhe të ligjit nr. 115/2016, si edhe atyre të Kreut IV (pikat 27-38) të vendimit nr. 5 datë 02.04.2019 “Për kriteret dhe procedurën e vlerësimit, pikëzimit dhe renditjes së kandidatëve për pozicionet vakante në Gjykatën Kushtetuese dhe të Inspektorit të Lartë të Drejtësisë”, secili nga anëtarët e Këshillit, znj. Vitore Tusha dhe znj. Arta Marku, në cilësinë e relatorit të vendeve vakante përkatësisht të treguar në pikat 1 dhe 2 të këtij Vendimi, ka realizuar veprimet përgatitore të procedurës së vlerësimit dhe pikëzimit të kandidatëve, njëkohësisht me procedurat e verifikimit të tyre.
4. Bazuar në aktet që janë dorëzuar nga kandidati Besnik Muçi në momentin e kandidimit dhe akteve e dokumenteve të tjera që janë administruar gjatë fazës përgatitore të procedurës së vlerësimit, secili nga anëtarët e Këshillit relator i vendeve vakante në të cilën ky kandidat ka paraqitur kandidaturën e tij, hartoi relacionin përkatës për gjetjet në procedurën e përzgjedhjes dhe të vlerësimit të këtij kandidati për gjyqtar në Gjykatën Kushtetuese.
5. Në përfundim të procedurave të verifikimit dhe vendimeve të dhëna për lejimin ose ndalimin e kandidimit për të gjithë kandidatët në secilin vend vakant, relatorët përkatës të sipërcituar në pikën 3 të këtij Vendimi, kanë njoftuar Kryetarin dhe kanë paraqitur për shqyrtim në mbledhjen e Këshillit, relacionin dhe dokumentacionin e përgatitur për secilin kandidat të vendit vakant lidhur me procedurën e përzgjedhjes dhe vlerësimit të kandidaturave.
6. Këshilli i Emërimeve në Drejtësi, me Vendimin nr. 112, në datën 07.08.2019 ka vendosur fillimin e procedurave të vlerësimit, pikëzimit dhe renditjes së kandidatëve të lejuar për vendet vakante, si më poshtë:
  - a) Vendi vakant për gjyqtar në Gjykatën Kushtetuese, vakancë e plotë, shpallur nga Presidenti i Republikës, në datën 07.02.2018.
  - b) Vendi vakant për gjyqtar në Gjykatën Kushtetuese, vakancë e plotë, shpallur nga Kuvendi, në datën 12.02.2018.
  - c) Vendi vakant për gjyqtar në Gjykatën Kushtetuese, vakancë e plotë, shpallur nga Presidenti i Republikës, në datën 04.03.2019.
  - ç) Vendi vakant për gjyqtar në Gjykatën Kushtetuese, vakancë e plotë, shpallur nga Kuvendi, në datën 04.03.2019.

7. Gjithashtu, me vendimin nr. 113 dhe nr. 114 të datës 07.08.2019, Këshilli ka miratuar kalendarin e intervistave me kandidatët e lejuar, si edhe listën e ekspertëve për gjuhët e huaja për dhënien e mendimit teknik për nivelin e zotërimit të tyre nga kandidatët.

8. Në mbledhjen e tij të datave 07.08.2019 dhe 09.08.2019, Këshilli shqyrtoi relacionet dhe procedurat e ndjekura gjatë veprimeve përgatitore nga secili relator si edhe plotësinë e dokumentacionit të paraqitur për vlerësim lidhur me secilin kandidat. Gjithashtu, Këshilli dëgjoi edhe mendimin e Avokatit të Popullit që, në thelb, nuk paraqiti vërejtje lidhur me mënyrën e procedimit të ndjekur për përgatitjen e dokumentacionit të kandidatit Besnik Muçi.

9. Pas këtyre veprimeve, në vijim të mbledhjes, Këshilli i Emërimeve në Drejtësi, ka zhvilluar procedurën e intervistës me kandidatët e lejuar, mbi motivimin e kandidimit dhe nivelin e zotërimit të gjuhëve të huaja, për dy nga vendet vakante në Gjykatën Kushtetuese, të treguara në pikën 6 të këtij Vendimi.

10. Intervista mbi motivimin e kandidimit dhe nivelin e zotërimit të gjuhëve të huaja me kandidatin e lejuar, Z. Besnik Muçi, kandidat për vendet vakante në Gjykatën Kushtetuese, të treguara në shkronjat “a” dhe “b” të pikës 7 të këtij Vendimi, u zhvillua në datën 07.08.2019.

11 Lidhur me nivelin e zotërimit të gjuhës angleze, të përzgjedhur nga vetë kandidati i lejuar z. Besnik Muçi, në vijim të bisedës së zhvilluar në këtë gjuhë gjatë një pjese të intervistës, Këshillit i është paraqitur edhe mendimi me shkrim nga ekspertja e caktuar me vendimin nr. 113 datë 07.08.2019, Dr. Adelina Albrahimi, pedagoge e brendshme e gjuhës angleze, Fakulteti i Gjuhëve të Huaja, Universiteti i Tiranës.

## **II. Vlerësimi i Këshillit të Emërimeve në Drejtësi**

12. Në përfundim të intervistës, bazuar në të dhënat e nxjerra nga biseda mbi motivimin e kandidimit, mendimin e ekspertës për nivelin e zotërimit të gjuhëve të huaja, si edhe bazuar në aktet dhe dokumentet që janë dorëzuar nga kandidati Besnik Muçi në momentin e paraqitjes së kërkesës për kandidim, dokumente të paraqitura prej tij sipas kërkesave të Këshillit, si edhe shkresa dhe të dhëna të tjera kërkuara apo të ardhura zyrtarisht nga institucione të ndryshme, Këshilli ka vënë në bisedim vlerësimin dhe pikëzimin e kandidatit Besnik Muçi për secilin nga kriteret e vlerësimit të përcaktuara:

- a) në pikën 4 dhe 5 të nenit 125 të Kushtetutës;
- b) në nenin 7/a të ligjit nr. 8577/2000 “Për organizimin dhe funksionimin e Gjykatës Kushtetuese të Republikës së Shqipërisë”, të plotësuar, për aq sa nuk përcaktohet ndryshe në këto dispozita, me kriteret e përgjithshme të vlerësimit të parashikuara në nenin 240 të ligjit nr. 115/2016;
- c) në detajimin e mëtejshëm të kriterëve ligjore të posaçme dhe të përgjithshme të vlerësimit dhe përcaktimin më të hollësishëm të peshës specifike të tyre në pikëzimin dhe renditjen e kandidatëve të treguar në Kreun II, në Kreun V dhe në Shtojcën 1 të Vendimit nr. 5 datë 02.04.2019 “Për kriteret dhe procedurën e vlerësimit, pikëzimit dhe renditjes së kandidatëve për pozicionet vakante në Gjykatën Kushtetuese dhe të Inspektorit të Lartë të Drejtësisë”;
- ç) në shpjegimet e hollësishme lidhur me metodologjinë mbi të cilin bazohet në vlerësimi dhe caktimi i pikëve të miratuar nga Këshilli i Emërimeve në Drejtësi me vendimin nr. 51 datë 21.06.2019 “Për miratimin e metodologjisë për vlerësimin dhe caktimin e pikëve për renditjen e kandidatëve për gjyqtar në Gjykatën Kushtetuese”.

### ***A. Meritat profesionale – Historiku Arsimor dhe Profesional***

## *Vjetërsia në profesion*

13. Në shkronjën “a” të pikës 3 të nenit 7/a të ligjit nr. 8577/2000, përcaktohet si kriter vlerësimi “*Vjetërsia në profesion*”. Ndërkohë që, sipas nenit 125 të Kushtetutës dhe nenit 7/a pika 2 shkronja “a” të ligjit nr. 8577/2000, përbën kusht lejimi kandidimi që kandidati të ketë së paku 15 vjet përvojë profesionale si gjyqtar, prokuror, avokat, profesor ose lektor të së drejtës, nëpunës (jurist) të nivelit të lartë në administratën publike.

14. Prandaj, Këshilli vlerëson me pikë kohëzgjatjen për më shumë se 15 vjet të këtyre fushave të përvojës profesionale të secilit kandidat, në maksimum deri në 4 pikë, sikurse orientohet në tabelën e përshkallëzuar të pikëzimit të vjetërsisë në profesion të treguar në Metodologjinë për vlerësimin dhe caktimin e pikëve për renditjen e kandidatëve për gjyqtar në Gjykatën Kushtetuese, të miratuar me vendimin nr. 51 datë 21.06.2019.

15. Sipas jetëshkrimit dhe dokumentacionit të administruar në procedurën e verifikimit të kandidaturës dhe në kuadër të veprimeve përgatitore të procedurës së vlerësimit, rezultoi që kandidati Besnik Muçi, ka ushtruar veprimtaritë profesionale si më poshtë:

- a) Jurist dhe Oficer i Policisë Gjyqësore, Dega e Doganës Pogradec, për periudhën, dhjetor 1995- shtator 1997.
- b) Avokat, me nr. Liçense Profesionale 803, Dhoma e Avokatisë Korçë, për periudhën dhjetor 1997 - shtator 1999.
- c) Stazhi Profesional i Shkollës së Magjistraturës, Prokuror në Prokurorinë e Rrethit Gjyqësor Elbasan, shtator 2001 janar 2002, dhe më pas i komanduar në Zyrën e Prokurorit të Përgjithshëm Tiranë, janar-tetor 2002.
- ç) Prokuror, për periudhën tetor 2002 - prill 2007, pranë prokurorisë, Gjykatës së Rrethit Gjyqësor Tiranë.
- d) Nëpunës i nivelit të lartë në administratën publike, Drejtor i Drejtorisë kundër Krimit Financiar, në Departamentin e Hetimit të Krimit të Drejtorisë së Përgjithshme të Policisë së Shtetit, Tiranë, për periudhën Maj 2007 - Korrik 2008, pranë Drejtorisë së Përgjithshme të Policisë së Shtetit.
- dh) Prokuror në Prokurorinë pranë Gjykatës së Shkallës së Parë për Krime të Rënda Tiranë, për periudhën gusht 2008 e në vazhdim.
- e) Drejtues (Komanduar) i Prokurorisë pranë Gjykatës së Rrethit Gjyqësor Kavajë për periudhën shkurt – shtator 2013.
- ë) Zëvendës Drejtues (Komanduar) i Prokurorisë Pranë Gjykatës së Shkallës së Parë për Krime të Rënda Tiranë, për periudhën nëntor 2013- shkurt 2014.
- f) Drejtues i Seksionit për veprat penale kundër personit, për ekzekutimin e vendimeve penale dhe marrëdhëniet juridiksionale me jashtë, në Prokurorinë Pranë Gjykatës së Shkallës së Parë për Krime të Rënda Tiranë, për periudhën Mars 2017 e në vazhdim.
- g) Ekspert i Programit për Trajnimin Vazhdues të Gjyqtarëve dhe Prokurorëve, të Shkollës së Magjistraturës, Shkolla e Magjistraturës, Tiranë për periudhën, prej vitit 2009 deri në vitin 2018.

16. Mbështetur në të dhënat e sipërcituara, rezultoi se në rastet e veprimtarive sipas shkronjës “b” deri “f” të pikës 15 të këtij Vendimi, kandidati Besnik Muçi ka ushtruar veprimtari profesionale në fushat e përcaktuara sipas nenit 125 të Kushtetutës dhe nenit 7/a të ligjit nr. 8577/2000. Ndërsa veprimtaritë sipas shkronjës “g” janë të përfshira në të njëjtën periudhë kalendarike. Prandaj, në momentin e vlerësimit, ky kandidat ka gjithsej rreth **20 vjet dhe 8 muaj** vjetërsi në punë.

17. Për këto arsye, për kriterin e vlerësimit “vjetërsia në profesion”, nisur nga ushtrimi i veprimtarive profesionale në një kohëzgjatje prej 20 vjet dhe 8 muaj, Këshilli çmoi ta vlerësojë kandidatin Besnik Muçi me **2 (dy) Pikë**.

### ***Historiku Arsimit***

18. Në shkronjën “d” të pikës 3 të nenit 7/a të ligjit nr. 8577/2000, përcaktohet si kriter vlerësimi edhe ecuria gjatë kryerjes së arsimit të lartë me një notë mesatare jo më pak se 8 ose të barasvlefshme me të, ndërkohë që edhe shkronja “c” e pikës 1 të nenit 240 të ligjit nr.115/2016 kërkon të vlerësohen rezultatet gjatë studimeve në ciklet e arsimit të lartë.

19. Prandaj, Këshilli vlerëson me pikë ecuria gjatë kryerjes së arsimit të lartë me një notë mesatare jo më pak se 8 ose të barasvlefshme me të të secilit kandidat, sipas përshkallëzimit me 1 pikë të notës mesatare mbi 8 dhe me 2 pikë të notës mesatare mbi 9, sikurse orientohet në Metodologjinë për vlerësimin dhe caktimin e pikëve për renditjen e kandidatëve për gjyqtar në Gjykatën Kushtetuese, të miratuar me vendimin nr. 51 datë 21.06.2019.

20. Sipas jetëshkrimit dhe dokumentacionit të administruar në procedurën e verifikimit të kandidaturës dhe në kuadër të veprimeve përgatitore të procedurës së vlerësimit, rezulton që kandidati Besnik Muçi ka përfunduar studimet dhe është diplomuar në vitin 1995 si jurist, në Fakultetin e Drejtësisë të Universitetit të Tiranës. Në zbatim të ligjit nr. 80/2015 ky lloj arsimimi kualifikohet si arsim i lartë juridik, Diplomë e Nivelit të Dytë.

21. Sipas certifikatës së notave të lëshuar nga Fakulteti i Drejtësisë, Universiteti i Tiranës dhe vetëdeklarimi i bërë nga kandidati Besnik Muçi, rezulton se ka përfunduar studimet universitare me notë mesatare **9.45**.

22. Për këto arsye, për kriterin e vlerësimit “historiku arsimor”, nisur nga nota mesatare **9.45** e arritur gjatë studimeve dhe diplomimit në Fakultetin e Drejtësisë të Universitetit të Tiranës, Këshilli çmoi ta vlerësojë kandidatin Besnik Muçi me **2 (dy) Pikë**.

### ***Kualifikime Pasuniversitare***

23. Në pikën 3 të nenit 7/a të ligjit nr. 8577/2000 dhe pikat 1 e 4 të nenit 240 të ligjit nr. 115/2016, si edhe në vendimin nr. 5 datë 02.04.2019 të Këshillit të Emërimeve në Drejtësi të nxjerrë në bazë e për zbatim të ligjit, përcaktohen si kriter vlerësimi pasja e titujve akademikë, gradave shkencore, ecuria dhe kryerja kualifikimeve pasuniversitare, studimeve dhe specializimeve afatgjata (përfshirë Shkollën e Magjistraturës), si edhe kryerja e trainimeve afatgjata dhe afatshkurtra në fushën e të drejtave kushtetuese, të drejtave të njeriut, si edhe në fusha të tjera të së drejtës.

24. Prandaj, në zbatim të ligjit, Këshilli i Emërimeve në Drejtësi vlerëson me pikë llojin e titujve akademikë dhe gradave shkencore, llojin, kohëzgjatjen, fushën dhe vendin e kryerjes së kualifikimeve pasuniversitare, studimeve, specializimeve dhe trainimeve të kandidatëve, duke pasur parasysh shpërndarjen e pikëve sipas vendimit nr. 5 datë 02.04.2019 të këtij Këshilli, si edhe orientimet që përmbahen në Metodologjinë për vlerësimin dhe caktimin e pikëve për renditjen e kandidatëve për gjyqtar në Gjykatën Kushtetuese, të miratuar me vendimin nr. 51 datë 21.06.2019.

25. Sipas jetëshkrimit dhe dokumentacionit të administruar në procedurën e verifikimit të kandidaturës dhe në kuadër të veprimeve përgatitore të procedurës së vlerësimit, rezulton që kandidati Besnik Muçi ka ndjekur Shkollën e Magjistraturës, Tiranë dhe Diplomuar

“Magjistrat Prokuror”, me rezultat “Shumë Mirë” në periudhën 1999- 2001. Në vijim ka ndjekur studimet pasuniversitare për Master të Nivelit të Dytë, në Fakulteti i Drejtësisë, Universiteti i Tiranës, me rezultat “Shumë Mirë”, në periudhën 2010 – 2011. Në vijim, Kandidat Doktorant në Fakultetin e Drejtësisë, Universiteti i Tiranës, me temë “Vështirësimet e konfiskimit të aseteve kriminale”, në periudhën janarit 2014 në vazhdim.

26. Për këto arsye, për kriterin e vlerësimit “studime afatgjata”, nisur nga përfundimi i Shkollës së Magjistraturës vlerësohet me **4 (katër ) Pikë**. Meqënëse kandidati ka kryer edhe studimet pasuniversitare për Master të Nivelit të Dytë, në Fakulteti i Drejtësisë, Universiteti i Tiranës, këtij vlerësimi i shtohen edhe **0.5 (zero pikë pesë) Pikë**. Në total, për këtë kriter vlerësimi kandidati Besnik Muçi vlerësohet me **4.5 (katër pikë pesë) Pikë**.

27. Sipas jetëshkrimit dhe dokumentacionit të administruar në procedurën e verifikimit të kandidaturës dhe në kuadër të veprimeve përgatitore të procedurës së vlerësimit, rezulton që kandidati Besnik Muçi ka ndjekur 34 veprimtari trainimi afatshkurtra në pjesën dërmuese të tyre në Shkollën e Magjistraturës Tiranë si dhe në Itali, Izrael, Rumani, Kosovë, Kroaci dhe Austri. Tematika e një pjesë të këtyre veprimtarive lidhet me *Hetimi i Krimit Financiar, Financimit të Terrorizmit dhe Pastrimit të Parave, Të dhënat teknike dhe personale për identifikimin e EURO-ve të falsifikuara, Parandalimi dhe lufta kundër kontrabandës dhe falsifikimit të markave të cigareve, Veprimet e Prokurorit dhe Avokatit në Gjyq, Ndihma ndaj viktimave dhe dëshmitarëve të drejtësisë, Kuadri ligjor lidhur me pastrimin e parave Sekuestrimi dhe konfiskimi i aseteve kriminale dhe administrimi i tyre, Aspektet praktike dhe vështirësitë e evidentuara gjatë zbatimit të ligjit për goditjen e krimit të organizuar dhe pastrimit të produktetve të krimit, Terrorizmi dhe Armët e Shkatërrimit në Masë Kondrabanda dhe Trafikimi i paligjshëm Mallrat me përdorim të dyfishtë* etj.

28. Duke pasur parasysh numrin, llojin, kohëzgjatjen dhe tematikat e veprimtarive trainuese të ndjekura nga kandidati Besnik Muçi, për këtë kriter ligjor vlerësimi Këshilli çmoi ta vlerësojë me **2 (dy) Pikë**.

#### ***Njohja e gjuhëve të huaja***

29. Në shkronjën “c” të pikës 4 të nenit 240 të ligjit nr. 115/2016, si edhe në vendimin nr. 5 datë 02.04.2019 të Këshillit të Emërimeve në Drejtësi të nxjerrë në bazë e për zbatim të ligjit, përcaktohet si kriter vlerësimi niveli i zotërimit të gjuhëve të huaja.

30. Prandaj, në zbatim të ligjit, Këshilli i Emërimeve në Drejtësi vlerëson me pikë llojin dhe numrin e gjuhëve të huaja, si edhe nivelin e zotërimit të tyre nga ana e kandidatëve, duke pasur parasysh sasinë e pikëve maksimale përkatëse sipas vendimit nr. 5 datë 02.04.2019 të këtij Këshilli, si edhe orientimet që përmbahen në Metodologjinë për vlerësimin dhe caktimin e pikëve për renditjen e kandidatëve për gjyqtar në Gjykatën Kushtetuese, të miratuar me vendimin nr. 51 datë 21.06.2019.

31. Sipas jetëshkrimit dhe dokumentacionit të administruar në procedurën e verifikimit të kandidaturës dhe në kuadër të veprimeve përgatitore të procedurës së vlerësimit, rezulton që kandidati Besnik Muçi zotëron gjuhën angleze. Sipas deklaratimit të kandidatit niveli i zotërimit të gjuhës të huaj është “shumë mirë” në të tre komponentët: të kuptuarit, të folurit dhe me shkrim. Gjithashtu kandidati ka deklaruar se njihë pak dhe Italisht, Rusisht dhe Greqisht (për të cilat nuk ka paraqitur dokumentacion). Për njohjen e gjuhës së huaj Anglisht ka paraqitur edhe dokumentet e lëshuara për zotërimin e saj, Dëshmia e datës 13.05.1995 e lëshuar nga Universiteti i Tiranës, me anën e së cilës vërtetohet se Z. Besnik Muçi ka mbrojtur me notën 7 gjuhën Angleze. Gjithashtu në dosje ndodhet edhe një certifikatë e

Abraham Lincoln Foundation of Albania, me anën e së cilës vërtetohet se Z. Besnik Muçi ka përfunduar nivelin “*Law Advanced of the EFL programme*” me rezultate shumë të mira).

32. Gjithashtu, gjatë intervistës së zhvilluar me Këshillin në datën 07.08.2019, për verifikimin e shkallës së zotërimit të gjuhës angleze, kandidati Besnik Muçi zhvilloi edhe bisedën me ekspertin e zgjedhur nga Këshilli, dr. Adelina Albrahimi. Në mendimin me shkrim të depozituar pranë Këshillit, ekspertja e njohurive të gjuhës angleze, në thelb, ka ardhur në përfundimin se kandidati Besnik Muçi shpalosi aftësi shumë të mira të të kuptuarit të gjuhës angleze, mund të kuptojë informacion teknik kompleks të lidhur me fushën ligjore dhe është në gjendje të formulojë mendimet përmes komunikimit korrekt, duke sugjeruar vlerësimin me **2 (dy) Pikë**.

33. Për këto arsye, duke pasur parasysh mendimin me shkrim të ekspertes së vlerësimit të shkallës së zotërimit të gjuhës angleze me 2 (dy) Pikë dhe intervistën e zhvilluar në këtë procedurë, Këshilli çmoi ta vlerësojë kandidatin Besnik Muçi për këtë kriter ligjor vlerësimi, në total me **2 (dy) Pikë**.

### ***B. Meritat profesionale – Kualifikimi i Përgjithshëm Profesional***

34. Në shkronjën “ç” të pikës 3 të nenit 7/a të ligjit nr. 8577/2000 dhe në shkronjën “a” të pikës 1 të nenit 240 të ligjit nr. 115/2016, si edhe në vendimin nr. 5 datë 02.04.2019 të Këshillit të Emërimeve në Drejtësi të nxjerrë në bazë e për zbatim të ligjit, në lidhje me kualifikimin e përgjithshëm profesional, përcaktohen si kritere vlerësimi, në bazë të treguesve shkencorë, performanca e dalluar dhe rezultatet e larta në ushtrimin e profesionit, që mbështetet ndërmjet të tjerave në botimet dhe artikujt shkencorë në fushën juridike, në produktet profesionale sipas profileve të ushtrimit të profesionit, rezultatet e vlerësimit profesional dhe të etikës të kandidatëve në punët që kanë bërë në të shkuarën, nëse ka, ose rezultatet e dallueshme të arritura gjatë përvojave të tyre të punës e që lidhen me ushtrimin e funksioneve në fushën përkatëse.

35. Prandaj, në zbatim të ligjit, Këshilli i Emërimeve në Drejtësi vlerëson me pikë si sasinë ashtu edhe cilësinë e rezultateve profesionale, me një fokus të veçantë tek cilësia. Në këtë mënyrë, bazuar në të dhënat e mundshme të disponueshme për vlerësim, mbahen parasysh sasia e pikëve maksimale prej 30 pikësh sipas vendimit normativ nr. 5 datë 02.04.2019 të këtij Këshilli, si edhe orientimet për caktimin e mundshëm të një maksimumi prej 25 pikësh për sa i përket vlerësimit cilësor dhe të një maksimum prej 5 pikësh për vlerësimin e sasisë së rezultateve profesionale sipas Metodologjisë për vlerësimin dhe caktimin e pikëve për renditjen e kandidatëve për gjyqtar në Gjykatën Kushtetuese, të miratuar me vendimin nr. 51 datë 21.06.2019.

36. Në rastin e kandidatit Besnik Muçi, Këshilli shqyrtoi dokumente profesionale dhe të dhënat që mund të disponoheshin nga veprimtaria e tij profesionale si Prokuror pranë Prokurorisë Pranë Gjykatës së Shkallës së Parë për Krime të Rënda Tiranë, si edhe nga kontributet e tjera profesionale të këtij kandidatije në veprimtari të ndryshme, përfshirë publikime apo punime e artikuj shkencorë.

37. Për sa i përket vlerësimit sasior, krahas të dhënave që rezultojnë nga jetëshkrimi dhe dokumentacioni i paraqitur nga vetë kandidati, Këshilli shqyrtoi edhe të dhënat e dërguara nga Këshilli i Lartë i Prokurorisë me shkresën nr. 353/4 prot., datë 09.09.2019 dhe shkresës nr. 353/6 prot., datë 10.09.2019. Sipas të dhënave zyrtare të përcjella nga ky institucion, në përputhje me natyrën e veprimtarisë dhe të detyrës që ka ushtruar, për periudhën 2014-2018, rezultojnë se kandidati Besnik Muçi ka pasur ngarkesë:

- Për vitin 2014 ka hetuar 46 procedime penale.
- Për vitin 2015 ka hetuar 62 procedime penale.
- Për vitin 2016 ka hetuar 63 procedime penale.
- Për vitin 2017 ka hetuar 37 procedime penale.
- Për vitin 2018 ka hetuar 35 procedime penale.
- Deri në Gusht 2019 ka hetuar 32 procedime penale.

38. Gjithashtu, nga dokumentacioni i administruar rezulton se kandidati Besnik Muçi, në cilësinë e autorit apo bashkëautorit, ka përgatitur 1 publikim profesional dhe kërkim shkencor, si edhe 8 artikuj profesional dhe 7 dokumente profesionale, si brenda ashtu edhe jashtë vendit, të cilat janë të fokusuara kryesisht në fushën e legjislacionit penal, sikurse tregohen më poshtë:

a) Publikime profesionale dhe kërkime shkencore:

- Libër me titull “*Veprat penale në fushën e narkotikëve*”, botuar në shtëpinë botuese “Julvin”, ISBN 99927-714-5-3, Maj 2002;

b) Artikuj të tjerë të botuar brenda dhe jashtë vendit:

- Artikulli me titull “*Aspektet Juridiko-Penale të Vrasjeve në familje, metodika e hetimit dhe mjetet e kërkimit të provave*”, botuar në revistën shkencorë të Akademisë së Sigurisë “Policimi dhe siguria”, Nr. 11, Qershor 2018;
- Artikulli me titull “*Prokuroria dhe Reforma në Drejtësi*”, në gazeta “Panorama” të datës 3 Shtator 2015;
- Artikulli me titull “*Aspekte praktike dhe vështirësitë e hasura në zbatimin e legjislacionit në goditjen e pastrimit të pasurive të krimit në Shqipëri*”, botuar nga Universiteti “Luigj Gurakuqi” Shkodër, Fakulteti i Drejtësisë, Konferencë Shkencore, me datë 12/03/2014;
- Artikull “*Duhet një reformë e Kodit Penal lidhur me Drogat*”, botuar në gazetën “Shqip” të datës 20 Prill 2012;
- Artikulli me temë “*Reformimi i institucionit të Prokurorisë*”, botuar në revistën shkencore “Jeta Juridike”, botim i Shkollës së Magjistraturës Nr.3, viti 2008;
- Artikulli me temë “*Metodika e hetimit të veprave penale të korrupsionit*”, revista shkencore “Jeta Juridike”, botim i Shkollës së Magjistraturës Nr.1, viti 2007;
- Botim në revistën “Jeta Juridike” nr. 3, Mars 2008 me titull “Opinionë dhe debat juridik”;
- Botim në gazetën “Shqip” me titull “Këshilli i Europës dhe Marti”;

c) Dokumente të tjera profesionale :

- Ekstrakt nga Konferenca “Mbrojtja juridiko penale e jetës së personit njerëzor në RSH”, Tetovë 12.03.2014;
- Pyetësor i Konferencës së Palëve të Këshillit të Europës;
- Kërkesë për dërgimin e çështjes në gjyq të procedimit penal nr. 44, datë 06.03.2018;
- Letërporosi gjyqësore në kuadër të procedimit penal nr. 90 të vitit 2014;
- Diskutim përfundimtar për çështjen penale nr. 294 të vitit 2014;
- Konkluzione përfundimtare për çështjen penale me të pandehur “Aldo Bare”, për veprat penale të “Vrasjes me paramendim” të parashikuar nga neni 78 i Kodit Penal; “Shkatërrimi i pronës me zjarr” të parashikuar nga neni 151/2 i Kodit Penal; “Mbajtjes pa leje të armëve luftarake të parashikuar nga neni 278 i Kodit Penal;



“Krijimit të organizatës kriminale” të parashikuar nga neni 333 i Kodit Penal;  
“Kryerjes së veprave penale nga organizata kriminale” të parashikuar nga neni 334 i Kodit Penal;

- Marrëveshje ndërmjet Prokurorisë për Krimet e Rënda dhe shtetasit person nën hetim A. S., për procedimin penal nr. 284, të vitit 2014, për veprat penale “Vjedhja me armë”e parashikuar nga neni 140 i Kodit Penal, “Krijimi i grupit të strukturuar kriminal” dhe “Kryerjes së veprave penale nga grupi i strukturuar criminal” të parashikuara nga nenet 333/a dhe 334 të Kodit Penal.

39. Mbështetur në këto të dhëna të rezultateve në ushtrimin e detyrës, si dhe në tematikën e përmbajtjen e produkteve profesionale të lidhura me ushtrimin e detyrës apo edhe me ushtrimin e profesionit, Këshilli vlerëson se në aspektin sasior kandidati Besnik Muçi ka tregues të lartë angazhimi profesional, i cili rezulton të jetë përtej asaj që mund të gjykohet si një angazhim i zakonshëm apo “mesatar” në ushtrimin e profesionit. Për këto arsye, Këshilli çmoi ta vlerësojë kandidatin Besnik Muçi për këtë kriter ligjor vlerësimi me **4.857 (katër pikë tetëqind e pesëdhjetë e shtatë) Pikë.**

40. Për sa i përket vlerësimit cilësor, Këshilli shqyrtoi të dhënat që rezultojnë nga jetëshkrimi dhe dokumentacioni i paraqitur nga vetë kandidati Besnik Muçi, veçanërisht pesë prej dokumenteve të përzgjedhura prej tij, me synimin për të evidentuar, bazuar në tregues shkencorë, elementë që dëshmojnë arritjen e rezultateve profesionale, shkallën e këtyre arritjeve, përfshirë elementë që nga këto dokumente profesionalë dhe në tërësi nga veprimtaria profesionale e kandidatit dëshmojnë spikatjen dhe dallueshmërinë e tij në kuptimin dhe qëllimin për të cilin Kushtetuta dhe ligji e përcakton si kusht për vlerësimin e kandidaturës për këtë Këshill dhe, më tej, për përzgjedhjen e gjyqtarit të Gjykatës Kushtetues nga organet e emërtesës.

41. Në veprimet përgatitore të kryera gjatë procedurave të verifikimit të kandidaturës, në datën 01.08.2019, kandidati Besnik Muçi ka njoftuar Këshillin me shkrim se për qëllimet e procedurës së vlerësimit në kuadër të pikëzimit për “Kualifikimin e Përgjithshëm Profesional” dhe “Kualifikimin Shtesë Profesional”, ka përzgjedhur pesë dokumentet profesionale si më poshtë:

1. Libër me titull “*Vepra penale në fushën e narkotikëve*”, me autor Z. Besnik Muçi, gjithsej 217 fletë;
2. Artikull i shkruar në revistën “Jeta juridike”, numri 1, viti IV i botimit, Tiranë, Mars 2007, botim i Shkollës së Magjistraturës, me titull “*Metodikat e hetimit të veprave penale të korrupsionit*”, gjithsej 52 faqe;
3. Tema e masterit të nivelit të dytë në shkencat penale, me titull “*Risite që soli ligji antimafia në fushën e sekuestrimit dhe konfiskimit të pasurive kriminale dhe përmbajtja e tij. Problematika që zgjidhi Vendimi Unifikues i Gjykatës së Lartë*”, Korrik 2011, gjithsej 72 faqe;
4. Artikull shkencor “*Ndryshimi i barrës së provës dhe dyshimi për veprimtari kriminale, dy elementë thelbësorë të procesit të sekuestrimit dhe konfiskimit të pasurive që rrjedhin nga krimi i organizuar dhe veprat me natyrë terroriste*”, gjithsej 22 faqe;
5. Konkluzione përfundimtare për çështjen penale me të pandehur “Aldo Bare”, për veprat penale të “Vrasjes me paramendim” të parashikuar nga neni 78 i Kodit Penal; “Shkatërrimi i pronës me zjarr” të parashikuar nga neni 151/2 i Kodit Penal; “Mbajtjes pa leje të armëve luftarake të parashikuar nga neni 278 i Kodit Penal; “Krijimit të organizatës kriminale” të parashikuar nga neni 333 i Kodit Penal;

“Kryerjes së veprave penale nga organizata kriminale” të parashikuar nga neni 334 i Kodit Penal.

42. Në lidhje me tërësinë e dokumenteve profesionale të paraqitura nga kandidati Besnik Muçi, dhe në veçanti, lidhur me pesë dokumentet profesionale të sipërcituara, për realizimin e vlerësimit profesional dhe të pikëzimit përkatës për këtë kriter ligjor vlerësimi, Këshilli shqyrtoi dhe bisedoi në mënyrë të posaçme dhe të kujdesshme përmbajtjen e tyre, duke u mbështetur mbi indikatorë shkencorë, sikurse janë edhe ato të përmendura në Shtojcën nr. 1 të vendimit sipas vendimit nr. 5 datë 02.04.2019 të këtij Këshilli, si edhe orientime që përmbahen në Metodologjinë për vlerësimin dhe caktimin e pikëve për renditjen e kandidatëve për gjyqtar në Gjykatën Kushtetuese, të miratuar me vendimin nr. 51 datë 21.06.2019.

43. Dokumentet profesionale të shqyrtuara trajtojnë tematika të ndryshme të drejtave dhe lirive themelore të njeriut, kryesisht të fushës së të drejtës penale dhe procedurës penale. Duke iu referuar dokumentacionit të dorëzuar vërehet se janë trajtuar tema që lidhen me: *Veprat penale në fushën e narkotikëve; Metodikat e hetimit të veprave penale të korrupsionit, Sekuestrimi dhe konfiskimi i pasurive kriminale, ndryshimi i barrës së provës dhe dyshimi për veprimtari kriminale, sipas ligjit antimafia* si dhe akte procedurale që lidhen me konkluzione përfundimtare të mbajtur në çështjet penale për vepra si: *“Vrasjes me paramendim” të parashikuar nga neni 78 i Kodit Penal; “Shkatërrimi i pronës me zjarr” të parashikuar nga neni 151/2 i Kodit Penal; “Mbajtjes pa leje të armëve luftarake të parashikuar nga neni 278 i Kodit Penal; “Krijimit të organizatës kriminale” të parashikuar nga neni 333 i Kodit Penal; “Kryerjes së veprave penale nga organizata kriminale” të parashikuar nga neni 334 i Kodit Penal etj..*

44. Njëri ndër indikatorët vlerësues të dokumenteve profesionale është *“Origjinaliteti dhe/ose impakti (duke përfshirë kontrollin për plagjiaturë) të dokumentit”*. Nisur nga profili profesional i kandidatit Besnik Muçi, përmbajtja e dokumenteve të analizuara të tematikës penale dhe dobisë së përdorimit të tyre nga profesionistë të fushës por edhe nga grupe interesi dhe publiku i gjerë, Këshilli vëren se dokumentet profesionale të shqyrtuara, sikurse edhe në rastin e publikimeve dhe artikujve profesionalë, dëshmojnë qasje profesionale origjinale të çështjeve ligjore të përzgjedhura për trajtim, për të cilat jo vetëm në kohën e publikimit por edhe aktualisht ka një interes të veçantë për njohje dhe zbatim.

45. Për rrjedhojë, pas shqyrtimit dhe analizës mbi dokumentacionin profesional të paraqitur, në lidhje me treguesin *“Origjinaliteti dhe/ose impakti (duke përfshirë kontrollin për plagjiaturë) të dokumentit”*, Këshilli e vlerëson kandidatin Besnik Muçi me **4.428 (katër pikë katërqind e njëzet e tetë) Pikë**.

46. Për sa i përket treguesit vlerësues të lidhur me *“Aftësitë analitike”*, Këshilli vëren se posaçërisht pesë dokumentet profesionale të shqyrtuara, sikurse edhe në rastin e publikimeve dhe artikujve profesionalë, kandidati Besnik Muçi tregon zotërimin e aftësive të dallueshme për të analizuar informacione dhe për të identifikuar, arsyetuar dhe zbatuar konceptet ligjore, parimet dhe institutet e së drejtës penale dhe procedurale penale, sipas natyrës dhe qëllimit të vetë këtyre punimeve.

47. Për rrjedhojë, pas shqyrtimit dhe analizës mbi dokumentacionin profesional të paraqitur, në lidhje me treguesin *“Aftësitë analitike”*, Këshilli e vlerëson kandidatin Besnik Muçi me **4.857 (katër pikë tetëqind e pesëdhjetë e shtatë) Pikë**.

48. Në lidhje me treguesin vlerësues “*Aftësitë kërkimore*”, Këshilli shqyrtoi veçanërisht pesë dokumentet profesionale të përzgjedhura nga kandidati Besnik Muçi, sikurse edhe publikimet dhe artikujt profesionalë, të paraqitur në dosjen e kandidatit. Nga ky shqyrtim, Këshilli vëren se këto punime përmbajnë informacione të larmishme të lidhura efektivisht me natyrën e së drejtës penale dhe procedurale penale, qëllimin dhe përmbajtjen e secilit prej punimeve të shqyrtuara, të nxjerra nga burime të ndryshme të doktrinës dhe praktikës gjyqësore vendase, si edhe prej atyre të shteteve të ndryshme dhe të institucioneve e gjykatave ndërkombëtare.

49. Për rrjedhojë, pas shqyrtimit dhe analizës mbi dokumentacionin profesional të paraqitur, në lidhje me treguesin “*Aftësitë kërkimore*”, Këshilli e vlerëson kandidatin Besnik Muçi me **3 (tre) Pikë**.

50. Për treguesit “*Saktësia dhe precizoni*”, në thelb, u verifikua nëse në veprimtarinë profesionale të kandidatit janë mbuluar me profesionalizëm tematika e përzgjedhur dhe materiali ka shmangur përsëritjet apo citimet e panevojshme etj. Nga shqyrtimi i dokumenteve profesionale të përzgjedhura nga kandidati Besnik Muçi, Këshilli vëren se këto punime tregojnë nivel të mirë të përcaktimit të tematikës dhe problemeve juridike për analizë dhe zgjidhje, përdorim të pasur dhe korrekt të terminologjisë juridike dhe strukturim e përdorim në mënyrën dhe vendin e duhur të gjetjeve nga legjislacioni, doktrina, si edhe praktika gjyqësore shqiptare dhe e huaj.

51. Për rrjedhojë, pas shqyrtimit dhe analizës mbi dokumentacionin profesional të paraqitur, në lidhje me treguesin “*Saktësia dhe precizoni*”, Këshilli e vlerëson kandidatin Besnik Muçi me **4.428 (katër pikë katërqind e njëzet e tetë) Pikë**.

52. Në lidhje me treguesin vlerësues “*Qartësia*”, Këshilli shqyrtoi pesë dokumentet profesionale të përzgjedhura nga kandidati Besnik Muçi, sikurse edhe publikimet dhe artikujt profesionalë të paraqitur në dosjen e kandidatit. Këshilli vëren se në këto punime janë të organizuara dhe strukturuar në mënyrën e duhur, gjuha e përdorur është e pasur, e thjeshtë dhe profesionale. Pasuria, qartësia e gjuhës së përdorur dhe organizimi i duhur i materialit i bëjnë këto punime të kuptueshme dhe të lexueshme, sipas natyrës së punimit dhe grupeve të interesit të cilave synon ti drejtohet.

53. Për rrjedhojë, pas shqyrtimit dhe analizës mbi dokumentacionin profesional të paraqitur, në lidhje me treguesin “*Qartësia*”, Këshilli e vlerëson kandidatin Besnik Muçi me **3.571 (tre pikë pesëqind e shtatëdhjetë e një) Pikë**.

54. Pas shqyrtimit dhe analizës se pesë indikatorëve të mësipërm që përbëjnë vlerësimin cilësor të dokumentacionit profesional të paraqitur nga kandidati, Këshilli çmoi ta vlerësojë kandidatin Besnik Muçi me **20,428 ( njëzet pikë katërqind e njëzet e tetë) Pikë**.

#### **A. Meritat profesionale – Kualifikimi Shtesë Profesional**

55. Në shkronjën “b” të pikës 2 dhe shkronjën “b” të pikës 3 të nenit 7/a të ligjit nr. 8577/2000, në shkronjën “b” të pikës 1 të nenit 240 të ligjit nr. 115/2016, si edhe në vendimin nr. 5 datë 02.04.2019 të Këshillit të Emërimeve në Drejtësi të nxjerrë në bazë e për zbatim të ligjit, në lidhje me kualifikimin e shtesë profesional, përcaktohen si kritere vlerësimi që kandidatët të kenë veprimtari të njohur në fushën e të drejtës kushtetuese, të drejtave të njeriut dhe në sfera të tjera të së drejtës, vlerësim të dallueshëm të rëndësisë së punimeve akademike, studimeve shkencore, shkrimeve dhe ligjëratave profesionale, botimeve, si dhe pjesëmarrjen në aktivitete shkencore, përvojë të veçantë në një fushë të caktuar të së drejtës,

ose këshilltar ligjor i Gjykatës Kushtetuese a Gjykatës së Lartë, si edhe pjesëmarrje të dallueshme në procesin e hartimit ose të konsultimit të legjislacionit dhe çdo angazhim tjetër profesional të kandidatit përgjatë 5 viteve të fundit në fushën e së drejtës.

56. Prandaj, në zbatim të ligjit, në varësi edhe të profileve dhe karrierave profesionale të secilit kandidat, nga totali prej 12 pikësh për këtë kategori vlerësimi, Këshilli i Emërimeve në Drejtësi vlerëson deri në 8 pikë ekspertizën në të drejtën kushtetuese dhe në të drejtat e njeriut ose ekspertizën në fusha të tjera të veçanta të së drejtës. Gjithashtu, Këshilli vlerëson deri në 4 pikë angazhimet profesionale shtesë të kandidatëve. Në arsyetimin dhe përfundimet e tij Këshilli mban parasysh rregullat e hollësishme të përcaktuara me vendimin normativ nr. 5 datë 02.04.2019 të këtij Këshilli, si edhe orientimet në përcaktimin e pikëve përkatëse të merituar sipas Metodologjisë për vlerësimin dhe caktimin e pikëve për renditjen e kandidatëve për gjyqtar në Gjykatën Kushtetuese, të miratuar me vendimin nr. 51 datë 21.06.2019.

57. Në rastin e kandidatit Besnik Muçi, krahas jetëshkrimit, intervistës dhe motivimit për kandidim, Këshilli shqyrtoi dokumentet profesionale dhe të dhënat që mund të disponoheshin nga veprimtaria e tij profesionale si Prokuror dhe veçanërisht pranë Gjykatës së Shkallës së Parë për Krimet e Rënda Tiranë, si edhe nga kontributet e tjera profesionale të këtij kandidati në veprimtari të ndryshme, përfshirë publikime apo punime e artikuj shkencorë, pjesëmarrjet në veprimtari shkencore dhe veprimtari të tjera profesionale të lidhura me fushat e së drejtës.

#### ***Specializimi në të drejtën kushtetuese, të drejtat e njeriut ose në fusha të tjera të së drejtës***

58. Për sa i përket kriterit të parë vlerësues, *ekspertizës në të drejtën kushtetuese dhe në të drejtat e njeriut ose ekspertizës në fusha të tjera të veçanta të së drejtës*, nisur nga të dhënat që rezultojnë nga jetëshkrimi, motivimi për kandidim, intervista dhe dokumente të tjera zyrtare mbi rezultate të vlerësimit profesional etj., si edhe nga shqyrtimi i dokumenteve profesionale të paraqitura nga kandidati Besnik Muçi, Këshillit i rezulton se historiku dhe karriera profesionale e këtij kandidati është i fokusuar në pjesën më të madhe të kohëzgjatjes dhe shtrirjes së tij në fushën e drejtësisë penale dhe procedurale penale, lirive themelore dhe të drejtave të njeriut në këtë fushë.

59. Këshilli vjen në këtë përfundim jo vetëm nga fakti që veprimtaria profesionale e këtij kandidati është e lidhur për rreth 20 vjet me ushtrimin e detyrave profesionale pranë Prokurorisë (prokuror pranë gjykatës së Shkallës së Parë/si dhe krimeve të rënda shkallë e parë, Drejtor i Drejtorisë kundër Krimit Financiar në Departamentin e Hetimit të Krimit të Drejtorisë së Përgjithshme të Policisë së Shtetit), përvojë, e cila, e lidhur edhe me interesin e dëshmuar vetjak profesional, ka ndikuar në formimin profesional dhe specializimin e këtij kandidati në fushat e së drejtë penale dhe procedurale penale si dhe të drejtave të njeriut në këto fusha.

60. Nga ana tjetër, Këshilli vëren edhe se në formimin profesional, specializimin dhe ekspertizën e posaçme profesionale të fituar kandidati Besnik Muçi, një rol të veçantë ka edhe interesi i treguar për ushtrimin e vazhdueshëm të veprimtarive të tjera profesionale me kohë të pjesshme si ekspert i programit për trajnimin vazhdueshëm të gjyqtarëve dhe prokurorëve të Shkollës së Magjistraturës; Pedagog i Jashtëm i lëndës E Drejta Penale e Posaçme dhe Procedurës Penale, në Fakultetin e Drejtësisë të Shkolle të Lartë Universitare private. Nga ana tjetër, edhe studimet pasuniversitare të ndjekura në Universitetin e Tiranës master i Nivelit të Dytë si dhe vazhdimi i procesit si kandidat doktorant pranë Universitetit të Tiranës Fakultetit të Drejtësisë janë fokusuar edhe në çështjet e të drejtave të njeriut në fushën penale.

61. Së fundi, si rrjedhojë dhe reflektim i përgatitjes profesionale dhe përvojës së fituar në ushtrimin e detyrave profesionale, në cilësinë e autorit, kandidati Besnik Muçi ka realizuar punime shkencore dhe artikuj profesionale, të botuara brenda dhe jashtë vendit, të cilat në pjesën më të madhe të tyre, trajtojnë aspekte të ndryshme të lidhura me njohjen, respektimin dhe mbrojtjen e lirive themelore e të drejtave të njeriut në fushën penale dhe procedurale penale.

62. Nisur nga kjo veprimtari profesionale, Këshilli vlerëson se kandidati Besnik Muçi dëshmon jo vetëm formimin e tij të plotë juridiko-profesional, por edhe se ka arritur një nivel të spikatur dhe të dallueshëm, jo vetëm teorik por edhe të zbatimit e të ndikimit efektiv në praktikë, të specializimit dhe ekspertizës ligjore, veçanërisht të thelluar në fushën penale.

63. Prandaj, në lidhje me kriterin vlerësues të “*ekspertizës në të drejtën kushtetuese dhe në drejtat e njeriut ose në fusha të tjera të së drejtës*” Këshilli e vlerëson kandidatin Besnik Muçi me **7 (shtatë) Pikë**.

#### ***Angazhime profesionale shtesë***

64. Për sa i përket kriterit të dytë vlerësues, *angazhimeve profesionale shtesë*, sipas të dhënave që rezultojnë nga jetëshkrimi, motivimi për kandidim, intervista dhe dokumentet e tjera zyrtare të administruara në dosjen e kandidatit Besnik Muçi, rezulton që për periudhën 1997-1999 ka ushtruar profesionin e Avokatit. Po ashtu për periudhën nga viti 2007 e në vijim, ky kandidat ka marrë pjesë në konferenca shkencore kombëtare dhe ndërkombëtare duke prezantuar punime të tij, ka qenë pjesëmarrës si përfaqësues institucional apo ekspert në projekte të ndryshme me fokus çështje në fushën e së drejtës penale të organizuara nga Komiteti MONYVAL pranë Këshillit të Europës, sikurse edhe Ekspert i Konferencës së Palëve për zbatimin e Konventës së Këshillit të Evropës mbi pastrimin, kerkimin, ngrirjen dhe konfiskimin e pasurive të rrjedhura nga krimi dhe financimi i terorizmit, përfaqësues i Prokurorisë së Përgjithshme të Republikës së Shqipërisë.

65. Këto angazhime shtesë profesionale janë të lidhura me kontribute dhe pjesëmarrje në përgatitjen e analizave ligjore dhe studimeve mbi çështje të ndryshme të të drejtave të njeriut, garancitë procedurale penale, antikorrupsioni, etj.

66. Prandaj, duke pasur parasysh këto angazhime shtesë profesionale, të shtrira në kohë dhe me kontribute konkrete profesionale në disa nga fushat më të rëndësishme të së drejtës, Këshilli vlerëson që për kriterin vlerësues të “*angazhimeve profesionale shtesë*”, ti caktojë kandidatit Besnik Muçi **3.571 (tre pikë pesëqind e shtatëdhjetë e një) Pikë**.

#### **Meritat Morale**

67. Në shkronjën “c” të pikës 2 të nenit 7/a të ligjit nr. 8577/2000 si kriter vlerësimi është përcaktuar që kandidatët të jenë vlerësuar për “*integritetin etik e moral*”. Po kështu, në shkronjën “a” të pikës 1 të nenit 240 të ligjit nr. 115/2016 përcaktohen si kriter “*Rezultatet e vlerësimit të etikës së kandidatëve gjatë punës, nëse ka*”, ndërsa në shkronjat “a” dhe “b” të pikës 2 të këtij neni përcaktohen si kriter vlerësimi edhe “*Reputacioni që gëzon kandidati në shoqëri dhe midis kolegëve*” dhe “*cilësitë morale, të tilla si ndershmëria, përpikëria në ushtrimin e detyrave, drejtësia në marrjen e vendimeve, përgjegjshmëria, besueshmëria, paanësia, dinjteti dhe prirja për të marrë përsipër përgjegjësi*”. Së fundi, në shkronjën “c” parashikohet si kriter vlerësimi edhe “*angazhimi i provuar në ndjekje të kauzave të shoqërisë civile*”. Në bazë dhe për zbatim të ligjit, lidhur me këto kriter vlerësimi, Këshilli i Emërimeve në Drejtësi ka nxjerrë vendimin normativ nr. 5 datë 02.04.2019 ku përcaktohen

rregullime më të hollësishme si edhe shpërndarja e pikëve të vlerësimit sipas peshës specifike të këtyre kriterëve.

68. Prandaj, në zbatim të ligjit, lidhur me meritat morale, nga totali prej 30 pikësh për të tre komponentët vlerësues, Këshilli i Emërimeve në Drejtësi vlerëson deri në 18 pikë *integritetin etik dhe moral*, deri në 10 pikë *reputacionin që gëzon kandidati në shoqëri dhe midis kolegëve* dhe deri në 2 pikë *angazhimin e provuar në ndjekje të kauzave të shoqërisë civile*. Në arsyetimin dhe përfundimet e tij Këshilli mban parasysh rregullat e hollësishme të përcaktuara me vendimin normativ nr. 5 datë 02.04.2019 të këtij Këshilli dhe Shtojcën nr. 1 të tij, si edhe orientimet në përcaktimin e pikëve përkatëse të merituar sipas Metodologjisë për vlerësimin dhe caktimin e pikëve për renditjen e kandidatëve për gjyqtar në Gjykatën Kushtetuese, të miratuar me vendimin nr. 51 datë 21.06.2019.

69. Në rastin e kandidatit Besnik Muçi, krahas jetëshkrimit, paraqitjes dhe sjelljes gjatë parashtrimeve në intervistë, motivimit për kandidim dhe historikut të komunikimit të kandidatit me Këshillin gjatë procesit të verifikimit dhe vlerësimit të kandidaturës, Këshilli i Emërimeve në Drejtësi shqyrtoi të dhënat nga dokumentet profesionale, aktet e tjera zyrtare të administruara në dosjen e kandidatit, si edhe çdo të dhënë a dokument tjetër të aksesueshëm publikisht nëpërmjet të cilave mund të nxirreshin elementë të dobishëm për qëllimet e verifikimit dhe vlerësimit të meritave morale të këtij kandidati.

#### ***Integriteti etik e moral***

70. Për sa i përket kriterit të parë vlerësues, *integritetit etik e moral*, nisur nga të dhënat që rezultojnë nga jetëshkrimi, motivimi për kandidim, intervista, komunikimi i kandidatit me Këshillin gjatë procedurave të verifikimit dhe vlerësimit, si edhe nga dokumente të tjera zyrtare apo të aksesueshme publikisht, Këshillit i rezulton se kandidati Besnik Muçi në veprimtarinë, sjelljen dhe komunikimin e tij tregon përkushtim dhe angazhim të ndërgjegjshëm në përmbushjen e detyrave profesionale dhe në ushtrimin e profesionit, si edhe vëmendje, ndjeshmëri dhe respekt në komunikim e bisedë, duke parashtruar argumentet e tij me dinjitet, duke dëgjuar dhe iu përgjigjur me kujdesin e duhur, me durim e vetëpërbajtje përkundrejt qëndrimeve dhe pyetjet të cilat i drejtohen nga bashkëbiseduesit.

71. Nga të dhënat e mundshme në dispozicion, Këshillit nuk i rezulton që kandidati Besnik Muçi të ushtrojë apo të ketë ushtruar funksionet e tij profesionale duke favorizuar palë të caktuara apo duke kërkuar përfitime për veten apo për të tjerët. Nuk rezultojnë të dhëna që ky kandidat të mos ketë respektuar detyrimin profesional të nderit dhe të dinjitetit, ndërtimit të marrëdhënieve profesionale dhe mirësjelljes në raport me kolegët, profesionistët e fushës, palët e përfshira në çështje pune etj.. Pra nuk ka të dhëna që me sjelljen dhe veprimtarinë e tij në jetën profesionale dhe personale të ketë cenuar apo të rrezikojë të cenojë imazhin dhe figurën publike të gjyqtarit dhe sistemit të drejtësisë.

72. Prandaj, në lidhje me kriterin vlerësues të "*integritetit etik e moral*" Këshilli e vlerëson kandidatin Besnik Muçi me **18 (tetëmbëdhjetë) Pikë**.

#### ***Reputacioni që gëzon kandidati në shoqëri dhe midis kolegëve***

73. Për sa i përket kriterit të dytë vlerësues "*reputacioni që gëzon kandidati në shoqëri dhe midis kolegëve*", nisur nga të dhënat që rezultojnë nga jetëshkrimi, motivimi për kandidim, intervista, komunikimi i kandidatit me Këshillin gjatë procedurave të verifikimit dhe vlerësimit, si edhe nga dokumente të tjera zyrtare apo të aksesueshme publikisht, Këshillit i rezulton se kandidati Besnik Muçi në veprimtarinë, sjelljen dhe komunikimin e tij tregon

angazhim dhe përkushtim në përmbushjen e detyrave të tij për zbatimin e drejtë të ligjit sipas kompetencave dhe përgjegjësi që i ngarkon ligji.

74. Sipas të dhënave që disponohen vërehet se, në përgjithësi, kandidati ka ushtruar me seriozitet, maturi dhe besnikëri detyrimet profesionale në ushtrimin e funksioneve pranë strukturave të ndryshme të sistemit të Prokurorisë dhe reflekton përgjegjshmëri dhe angazhimet profesionale të mirë edhe në veprimtari jashtë ushtrimit të këtij funksioni. Gjithashtu, Këshilli vëren se nuk ka të dhëna që të tregojnë se ky kandidat në kryerjen e detyrës dhe në jetën personale të ketë kryer veprimtari që rezultojnë përtej kufijve ligjorë në raport me statusin dhe detyrat profesionale të kryera.

75. Prandaj, në lidhje me kriterin vlerësues të *“reputacioni që gëzon kandidati në shoqëri dhe midis kolegëve”* Këshilli e vlerëson kandidatin Besnik Muçi me **8,571 (tetë pikë pesëqind e shtatëdhjetë e një) Pikë.**

#### ***Angazhimi i provuar në ndjekje të kauzave të shoqërisë civile***

76. Për sa i përket kriterit të dytë vlerësues *“angazhimi i provuar në ndjekje të kauzave të shoqërisë civile”*, nisur nga të dhënat që rezultojnë nga jetëshkrimi, motivimi për kandidim, intervista, komunikimi i kandidatit me Këshillin gjatë procedurave të verifikimit dhe vlerësimit, si edhe nga dokumente të tjera zyrtare apo të aksesueshme publikisht, Këshilli i rezulton se, përgjithësisht, kandidati Besnik Muçi nuk ka qenë i angazhuar në veprimtari të tjera të përshtatshme jashtë atyre të lidhura me ushtrimin e detyrës ose të profesionit për ndjekje të kauzave të shoqërisë civile.

77. Prandaj, në lidhje me kriterin vlerësues të *“angazhimi i provuar në ndjekje të kauzave të shoqërisë civile”* Këshilli vlerëson ti caktojë kandidatit Besnik Muçi **0 (zero) Pikë.**

#### **Meritat organizative, drejtuese dhe menaxheriale**

78. Në nenin 240 të ligjit nr. 115/2016 parashikohen si kritere vlerësimi disa komponentë të lidhura me aftësitë profesionale dhe personale të kandidatëve mbi çështjet e natyrës drejtuese, organizative, të kapacitetit për vendimmarrje, punës në grup, të komunikimit dhe përfaqësimit publik. Kështu, në pikën 3 të këtij neni parashikohen kriteret vlerësuese për kandidatët si më poshtë:

- “a) cilësinë e platformës dhe të vizionit që paraqesin”;
- b) aftësitë e provuara për të marrë vendime dhe përgjegjësi bazuar në përvojat e mëparshme profesionale dhe shoqërore;
- c) aftësitë e komunikimit;
- ç) aftësitë e të punuarit në grup dhe në ambiente multidisiplinore ose multikulturore;
- d) aftësitë e përfaqësimit publik.”

79. Në bazë dhe për zbatim të ligjit, lidhur me këto kritere vlerësimi, Këshilli i Emërimeve në Drejtësi ka nxjerrë vendimin normativ nr. 5 datë 02.04.2019 ku përcaktohen rregullime më të hollësishme si edhe shpërndarja e pikëve të vlerësimit sipas peshës specifike të këtyre kritereve.

80. Prandaj, në zbatim të ligjit, lidhur me meritat organizative, drejtuese dhe menaxheriale, nga totali prej 10 pikësh për të pesë komponentët vlerësues të sipërcituar, Këshilli i Emërimeve në Drejtësi vlerëson deri në 3 pikë *cilësinë e platformës dhe të vizionit që paraqesin* kandidatët, deri në 4 pikë *aftësitë e provuara për të marrë vendime dhe përgjegjësi bazuar në përvojat e mëparshme profesionale dhe shoqërore*, deri në 2 pikë *aftësitë e*

*komunikimit dhe aftësitë e përfaqësimit publik, si edhe me 1 pikë për aftësitë e të punuarit në grup dhe në ambiente multidisiplinore ose multikulturale.* Në arsyetimin dhe përfundimet e tij, Këshilli mban parasysh rregullat e hollësishme të përcaktuara me vendimin normativ nr. 5 datë 02.04.2019 të këtij Këshilli dhe Shtojcën nr. 1 të tij, si edhe orientimet në përcaktimin e pikëve përkatëse të merituar sipas Metodologjisë për vlerësimin dhe caktimin e pikëve për renditjen e kandidatëve për gjyqtar në Gjykatën Kushtetuese, të miratuar me vendimin nr. 51 datë 21.06.2019.

81. Në rastin e kandidatit Besnik Muçi, krahas jetëshkrimit, paraqitjes dhe sjelljes gjatë parashtrimeve dhe bisedës në intervistë, përmbajtjes së motivimit për kandidim dhe historikut të komunikimit të kandidatit me Këshillin gjatë procesit të verifikimit dhe vlerësimit të kandidaturës, Këshilli i Emërimeve në Drejtësi shqyrtoi të dhënat nga dokumentet profesionale, aktet e tjera zyrtare të administruara në dosjen e kandidatit, si edhe çdo të dhënë a dokument tjetër të aksesueshëm publikisht nëpërmjet të cilave mund të nxirreshin elementë të dobishëm për qëllimet e verifikimit dhe vlerësimit të meritave organizative, drejtuese dhe menaxheriale të këtij kandidati.

#### ***Cilësia e platformës dhe të vizionit***

82. Këshilli shqyrtoi përmbajtjen e dokumentit me shkrim, platformës mbi motivimin e kandidimit dhe vizionit të kandidatit Besnik Muçi lidhur me qasjen dhe qëndrimet e tij mbi rëndësinë dhe aspektet thelbësore të ushtrimit të detyrës së gjyqtarit të Gjykatës Kushtetuese, mbi sfidat kryesore me të cilat është përballur dhe duhet të përballlet Gjykata Kushtetuese në ushtrimin e përgjegjësve dhe kompetencave që i ngarkon Kushtetuta dhe ligji, si edhe lidhur me mendimet e kandidatit për çështjet që duhet të trajtohen me përparësi e në perspektivë për mirëorganizimin dhe mirëfunksionimin e kësaj Gjykate, për përballimin e sfidave me të cilat përballlet për shkak të mosfunksionimit të tij për një kohë të gjatë, si edhe nisur nga pritshmëritë që lindin nga ndryshimet e kompetencave dhe të juridiksionit në veprimtarinë e kësaj Gjykate. Gjithashtu, në vlerësimin e këtij kriteri, Këshilli mban parasysh edhe parashtrimet dhe shpjegimet e dhëna nga ky kandidat gjatë intervistës dhe në përgjigje të pyetjeve që iu drejtuan nga anëtarët e Këshillit.

83. Nisur nga dokumenti me shkrim dhe shpjegimet e paraqitura gjatë intervistës, Këshilli vëren se kandidati Besnik Muçi paraqiti një nivel të mirë të njohjes dhe përvojës profesionale të tij në lidhje me rolin dhe pritshmëritë për ushtrimin e funksionit të gjyqtarit të Gjykatës Kushtetuese, si edhe të kësaj Gjykate në mirëfunksionimin e sistemit demokratik, ndarjes dhe balancimit të pushteteve, shtetit ligjor, respektimit të lirive themelore dhe të drejtave të njeriut dhe në tërësi për zhvillimin ekonomik e social të vendit. Gjithashtu, ky kandidat parashtrroi cilësitë, aftësitë dhe përkushtimin e tij për përmbushjen e misionit të Gjykatës Kushtetuese.

84. Prandaj, në lidhje me kriterin vlerësues "*cilësia e platformës dhe të vizionit të paraqitur*" nga kandidatët Këshilli vlerëson ti caktojë kandidatit Besnik Muçi **1.857 (një pikë tetëqind e pesëdhjetë e shtatë) Pikë.**

#### ***Aftësitë e provuara për të marrë vendime dhe përgjegjësi bazuar në përvojat e mëparshme profesionale dhe shoqërore***

85. Lidhur me aftësitë e provuara për të marrë vendime dhe përgjegjësi, Këshilli mbështetet pikësesëpari në të dhënat që lidhen me përvoja konkrete nga karriera e kandidatëve në funksione dhe pozicione të cilat kërkojnë dhe tregojnë marrjen përsipër të përgjegjësive dhe ushtrimin e vendimmarrjes në ushtrimin e kompetencave dhe përmbushjen e detyrave të



ngarkuara. Gjithashtu, në vlerësimin e kandidatëve për këtë komponent vlerësimi, Këshilli mban parasysh se ushtrimi i çdo detyre, funksioni dhe veprimtarie profesionale, edhe kur formalisht nuk lidhet drejtpërdrejt me të drejtën/detyrimin për ushtrimin e kompetencës vendimmarrëse, gjithsesi përmban elementë që tregojnë aftësi të provuara ose premtuese për të marrë nisma, për të kërkuar zgjidhje, për të marrë përgjegjësitë si edhe vendimet e duhura e në kohën e duhur sipas përcaktimeve të ligjit dhe në përgjigje të ndjeshmërisë së publikut.

86. Në rastin e kandidatit Besnik Muçi, krahas jetëshkrimit, parashtrimeve dhe bisedës në intervistë, përmbajtjes së platformës dhe motivimit për kandidim, Këshilli i Emërimeve në Drejtësi shqyrtoi të dhënat nga dokumentet profesionale, si edhe aktet e tjera zyrtare të administruara në dosjen e kandidatit, për të evidentuar të dhëna në lidhje me aftësitë e provuara apo premtuese të këtij kandidati për të marrë vendime dhe përgjegjësi edhe në ushtrimin e funksionit të gjyqtarit të Gjykatës Kushtetuese.

87. Këshilli vëren se kandidati Besnik Muçi, në karrierën e tij profesionale, ka ushtruar funksionin Drejtor i Drejtorisë kundër Krimit Financiar, në Departamentin e Hetimit të Krimit të Drejtorisë së Përgjithshme të Policisë së Shtetit, Tiranë, për periudhën Maj 2007 - Korrik 2008, pranë Drejtoria e Përgjithshme e Policisë së Shtetit; Drejtues (Komanduar) i Prokurorisë pranë Gjykatës së Rrethit Gjyqësor Kavajë për periudhën shkurt – shtator 2013; Zëvendës Drejtues (Komanduar) i Prokurorisë Pranë Gjykatës së Shkallës së Parë për Krime të Rënda Tiranë, për periudhën nëntor 2013- shkurt 2014 si dhe Drejtues i Seksionit për veprat penale kundër personit, për ekzekutimin e vendimeve penale dhe marrëdhëniet juridiksionale me jashtë, në Prokurorinë Pranë Gjykatës së Shkallës së Parë për Krime të Rënda Tiranë, për periudhën Mars 2017 e në vazhdim; Antar i Bordit të Konferencës së Palëve të Këshillit të Evropës për zbatimin e Konventës së Varshavës, përfaqësues i Prokurorit të Përgjithshëm në vitet 2015-2018. Nga jetëshkrimi dhe të dhënat zyrtare rezulton se në pozicionit e drejtuesit, ky kandidat ka ushtruar përgjegjësitë e bashkërendimit të punëve pranë këtyre institucioneve.

88. Nga ana tjetër, veprimtaria profesionale si prokuror dhe drejtues i institucioneve të lartpërmendura në veçanti, nisma dhe kurajo profesionale në ndjekjen e çështjeve të trajtuara nga ky kandidat tregojnë të dhëna premtuese edhe për marrjen e përgjegjësisë dhe nismës për vendimmarrje, të cilat së bashku me profesionalizimin kanë rëndësi thelbësore për ushtrimin e suksesshëm të detyrë së gjyqtarit të Gjykatës Kushtetuese.

89. Prandaj, në lidhje me kriterin vlerësues *“aftësitë e provuara për të marrë vendime dhe përgjegjësi bazuar në përvojat e mëparshme profesionale dhe shoqërore”*, Këshilli vlerëson ti caktojë kandidatit Besnik Muçi **2.571 (dy pikë pesëqind e shtatëdhjetë e një) Pikë**.

#### ***Aftësitë e komunikimit dhe aftësitë e përfaqësimit publik***

90. Aftësitë e komunikimit, në të gjitha format, veçanërisht me kolegët dhe palët, sikurse edhe në përfaqësimin publik e me të tretët, të shprehurit në mënyrë të qartë, lehtësisht të kuptueshme, të matur, me respekt dhe në mënyrë jodiskriminuese, luajnë një rol të rëndësishëm në kryerjen e funksionit të gjyqtarit të Gjykatës Kushtetuese.

91. Nga shqyrtimi i jetëshkrimit, mënyra dhe stili i parashtrimeve me shkrim të platformës, sjellja, mënyra e komunikimit dhe argumentimit gjatë bisedës në intervistë, si edhe nga përmbajtja, strukturimi dhe stili i hartimit të dokumenteve profesionale të administruara në dosjen e kandidatit, Këshilli vëren se kandidati Besnik Muçi zotëron aftësi të mira për të komunikuar me maturi, për të dëgjuar me respekt dhe për tu përgjigjur me profesionalizëm, qartësi e thjeshtësi, me stil dhe gjuhë të pasur në lidhje me të gjitha çështjet dhe

problematikat që vlerëson të trajtohen, ashtu edhe për çështje dhe problematika që ngrihen nga të tjerët.

92. Gjithashtu, pa pasur qëllimin dhe pa marrë përsipër të tregojë se dallohet mbi të tjerët, nga materialet me shkrim dhe nga komunikimi e biseda gjatë intervistës, rezulton se ky kandidat zotëron edhe aftësi të mira për përfaqësimin publik, pra për të përfaqësuar atë që mendon se është e përbashkët me të tjerë në lidhje me një çështje apo kauzë të caktuar.

93. Prandaj, në lidhje me kriterin vlerësues të *“Aftësitë e komunikimit dhe aftësitë e përfaqësimit publik”*, Këshilli vlerëson ti caktojë kandidatit Besnik Muçi **1,571 (një pikë pesëqind e shtatëdhjetë e një) Pikë**.

#### *Aftësitë e të punuarit në grup dhe në ambiente multidisiplinore ose multikulturore*

94. Gjyqtari i Gjykatës Kushtetuese, për vetë natyrën e këtij funksioni, mënyrës së funksionimit dhe kolegjalitetit të kërkuar në veprimtarinë e vendimmarrjen kësaj Gjykate, duhet të zotërojë aftësitë e duhura për një qasje metodike ndaj punës, si dhe aftësinë për të qenë i përfshirë në punën në grup, me gjyqtarët e tjerë, këshilltarët dhe anëtarët e stafit të Gjykatës. Pjesë e kësaj aftësie është edhe nevoja për t'u përshtatur shpejt me zhvillimet e reja, si edhe ndaj nevojës për tu përfshirë në veprimtari në ambiente multikulturale dhe multidisiplinore gjatë karrierës gjyqësore.

95. Nga shqyrtimi i jetëshkrimit, sjellja, mënyra e komunikimit dhe argumentimit gjatë bisedës në intervistë, si edhe nga dokumentet profesionale të administruara në dosjen e kandidatit, Këshilli vëren se kandidati Besnik Muçi zotëron aftësitë e duhura për të punuar në grup, përfshirë atë për të punuar në ambiente multikulturale dhe multidisiplinore. Prezantimi dhe dokumentet profesionale dëshmojnë se ky kandidat është përfshirë vijë mësisht në projekte profesionale me kolegë të tjerë, vendas apo të huaj, për realizimin e publikimeve shkencore dhe artikujve profesionalë.

96. Gjithashtu, ushtrimi për një kohë të gjatë i funksionit të këshilltares ligjore në Gjykatën Kushtetuese, për vetë mënyrën kolegjiale dhe punën në grup që kërkohet në këtë Gjykatë për përgatitjen e çështjeve për shqyrtim, bisedimin e zgjidhjes së tyre dhe përgatitjen e vendimeve përkatëse, i kanë mundësuar këtij kandidatit fitimin e përvojës dhe shprehive të duhura për punën në grup dhe në çështje e situata të larmishme. Zotërimi i këtyre aftësive rezulton i reflektuar edhe në vetë mënyrën e parashtrimit me shkrim të çështjeve në platformën e paraqitur, si edhe në komunikimin e bisedën e zhvilluar me Këshillin gjatë intervistës.

97. Prandaj, në lidhje me kriterin vlerësues *“Aftësitë e të punuarit në grup dhe në ambiente multidisiplinore ose multikulturale”*, Këshilli vlerëson ti caktojë kandidatit Besnik Muçi **1 (një) Pikë**.

#### **Vlerësimi përfundimtar i kandidatës**

98. Në përfundim të arsytimit mbi mënyrën dhe shkallën e vlerësimit për të gjitha kriteret ligjore të parashikuara nga ligji dhe të pikëzimit përkatës të treguar më sipër në këtë Vendim, në funksion të procedurave ligjore të përzgjedhjes së gjyqtarit të Gjykatës Kushtetuese dhe për efekt të renditjes së kandidatëve për vendet vakante në të cilat ka kandiduar, Këshillit të Emërimeve në Drejtësi i rezulton se kandidati Besnik Muçi vlerësohet në total me **81,926 (tetëdhjetë e një pikë nëntëqind e njëzet e gjashtë) Pikë**.

## PËR KËTO ARSYE:

Në mbështetje të pikës 1 të nenit 149/d të Kushtetutës, të nenit 7/a dhe 7/b të ligjit nr. 8577/2000 “ Për organizimin dhe funksionimin e Gjykatës Kushtetuese të Republikës së Shqipërisë”, të pikës 3 të nenit 229, pikës 4 të nenit 235, pikës 5 të nenit 236 dhe pikës 3 të nenit 237 të Ligjit nr. 115/2016 “Për organet e qeverisjes së sistemit të drejtësisë”, si edhe të shkronjës “a” të pikës 50 të Vendimit të Këshillit të Emërimeve në Drejtësi nr. 4 datë 11.03.2019 “Për procedurën e verifikimit të kandidatëve për pozicionet vakante në Gjykatën Kushtetuese dhe të Inspektorit të Lartë të Drejtësisë”, Këshilli i Emërimeve në Drejtësi

## VENDOSI:

1. Vlerësimin e kandidatit Besnik Muçi, me 81.926 (tetëdhjetë e një pikë nëntëqind e njëzet e gjashtë) Pikë në vendin vakant për gjyqtar në Gjykatën Kushtetuese, të shpallur nga:

- a) Presidenti i Republikës në datën 07.02.2018 dhe
- b) Kuvendi i Republikës së Shqipërisë 12.02.2018

2. Në zbatim të nenit 238 të Ligjit nr. 115/2016, ky vendim i njoftohet kandidatit Besnik Muçi.

3. Ky vendim publikohet në faqen zyrtare të Gjykatës së Lartë, në pjesën e përcaktuar për Këshillin e Emërimeve në Drejtësi.

**KRYETARI**

**Ardian DVORANI**

